

三水縣志卷七

知縣朱廷謨主修

陽湖孫星衍撰

兵防十

蟬川府

唐地里志邠州有府十一蟬川

舊志半川府在縣北十五里唐太宗關中設府兵二百六十一屯此其一也左右寺院石碣皆勒武義將軍之號

星衍案今譌為半非也

豪邱堡

太平寰宇記豪邱堡在縣西十八里東南三坡峭峻高十丈北面築城高二丈唐武德二年置貞觀元年廢

舖路

三水縣志卷七

舊志三水之舖十有四所以備傳遞郵命以需急務東則三舍西則二舍南則四舍北則五舍悉統於邑承發之總舖東路有萬壽舖職田舖北坡舖達馬蘭以通榆林西路有魏落舖原得舖以達邠州南路有甘峪舖姚家舖排沙舖土橋舖以應淳化北路有馬坊舖大羽舖甘家舖長嶺舖以接慶寧

漢鄧禹

禹以上郡北地安定三郡饒蓄積於是引軍北至郿邑休兵養士以觀其敝邑人盧芳開門歸附駐數月民賴以寧後帝勅禹進攻長安遣馮愔宗歆守郿

漢馮異

建武二年赤眉延岑暴亂三輔鄧禹不能定乃遣異代禹討之異引兵而西隴右隗囂令部落襲郿邑異即馳兵潛往閉城偃旗囂兵不知乘其不意擊鼓而出囂軍驚亂大破之

後魏賀拔岳

字阿斗泥尖山人初為太學生能左右馳射驍勇絕倫不讀兵書而暗與之合識者咸異之大統時

擁重兵鎮恒州

後魏賀拔勝

岳之兄也岳被侯莫陳悅所害孝武又委勝腹心之寄復鎮恒州

元桑哥失里 歷西臺御史守官家洞及明大將徐達遣兵攻之勢窮不屈與妻俱投崖死

元朱春珍 嘗為三原縣尹同失里在洞謂其妻曰我當以死報國妻曰卿能盡忠妾不能盡節乎亦俱投崖下死

明杜應奎 字海宇萬歷癸丑武進士初授遼東清陽守備屢建戰塞外臂中鹿鏃骨療之神色自若有古名將風及歸里寇逼門庭率蒼頭軍大破之邑賴以全邑俗不知織紡募女師以教之邑地不務稻禾開淤土以種之至今戶食其利咸欲建祠以報焉

明杜可相 字肖海應奎子貌魁梧喜騎射有父風以邊功授蘭州守備勦寇屢建殊勲陞靖遠叅將繼遷寧夏左協

副將及逆闖入關隱居石巖不出

國朝劉倂 字我敬少有大志不甘以耕鑿終其身遂從事行伍屢以戰功授滇南義勇前營總兵會水西之亂率師征之奮戈大戰賊衆披靡縱騎追逐誤陷大澤淤中賊弩環射不屈而死奉

旨建塋賜祭三壇遣藩伯躬奠焉

紀登雲 字鳳山起行伍驍勇敢戰初任邠州守備分防幽淳遇賊回方塘報可也陞袁州都司或以宜先塘報上聞登雲曰待殺歷崇明春江遊擊遷吳川叅將

三水縣志卷七

趙英 禮縣人三水籍康熙十三年實授邠州營把總駐防三水縣

張虎臣 本縣蒲村里人四川督標隨征都司

樊國棟 富平人本縣刑房典吏斬賊首一顆

崔永寧 北宮里人鄉練總斬賊首一顆

喬坤 職田里人鄉練總斬賊首一顆

李必造 北宮里人縣役斬賊首一顆

趙安 涇陽縣人斬賊首一顆

魏天定 職田里人鄉練總斬賊首二顆

趙中魁 義豐里人鄉練總斬賊首一顆

許稔 南宮里人鄉練總斬賊首一顆

李從貞 原得里人縣役斬賊首一顆

鄭國棟 金泉里人斬賊首一顆

王浩張巽郭洪蛟

俱本縣人同斬賊首一顆

其餘殺傷賊衆尙多但無首級可據姑闕不錄

董正

職田里人守北城禦賊死之

第五小根

南宮里人禦賊死之

明文翔鳳幽防議

三水同官耀州者畿輔之藩也寧州真寧宜君者又三邑之藩也盜自三水入者十之七自同耀入者十之三榆林定邊之直子午嶺而下也中部宜君之徑子午嶺而西也皆會於劉家店子卽杜詩所謂子午關者而一支可自馬蘭直入同官一支可自馬蘭直入耀之柳林鎮一支可自馬蘭出三水之石門關是馬蘭其一扼要區也而馬蘭河卽吾三水之源源可沿川直至縣然谷側蹶近未有繇此者劉家店一支又可自兩女砦直入三水之職田鎮則劉家店又大扼要區也而防者宜防此以遏其入勦者宜從此入以從其所歸落此東盜之概也故宜君寧州真寧之衛嚴則三水同耀靖三水同耀之衛嚴則涇陽三原富平又何從受兵耶余生長界幽少嘗北至慶陽西至鎮原東至山河鎮石門一道又其所屢出頗諳其要地之防特出胞中粉本爲此議以代抵掌羣公可據案而坐策耳嘗謬爲四道會勦之說欲以慶陽道駐寧州鄜州道駐宜君守道駐耀州巡道駐邠州以一府廳駐三水督餉其中爲接應大掃除而就近勦則兩道分駐而亦可辦耀州爲受盜之衝守道駐耀以逐其去三水爲納盜之衝巡道駐邠以要其歸總之東防勦於劉家店西防勦於寧州中立防於真寧此地形之不可易者也兵太分則土兵客兵

之相輒固不宜角立兵太合則東衝西衝之分據亦不便歸併兵少則將不給兵多則將驕而餉亦不易給倘兵委之將將委之敵而無監軍之司道則制將難無轉餉之府廳則兵飫飽難濫殺可虞橫斂誰馭而山深道曠卽給行糧又於何處辦食耶則乾餽酒漿之具卽他爲取辦亦弗得太恤大略勦加於邊盜而撫加於內地之脅從勦行而後可撫盜定而後可防以久安耳必有全籌惠我西土

林逢泰荅兩憲諮詢利弊議

看得軍興以來兵苦于行間民困于輓運亦已極矣本縣與賊爲隣擾攘迄無寧日又溝崖疊險車路不通輓運尤其艱難竊意生財之源在於足民而後軍需可繼輓運之法在於轉輸而後民力不疲如緩征以紓民困改折以便徵輸此本縣今日民生所懸望者至於兵貴神速早奏蕩平自不致有匱乏之虞籌兵尤宜核兵籌餉尤宜核餉酌盈濟虛因時量用憲臺自有碩畫非卑職所能參末議也

林逢泰請防禦議

看得本縣山陬僻邑土蕪人稀城內居民不過百餘家不足當一城之守防兵寥寥十餘人僅可供撥塘之役其空虛實甚況土橋底廟等處皆屬要地而最險要者莫如東南石門關一帶深山峻崖乃耀州淳化宜君同官交錯之地奸宄出沒無常昔年設有巡檢司今廢近據鄉民稟聞深山之中時有賊衆數十乘夜來往及召集鄉勇巡緝則潛遁不知去向似此情形誠恐釀成叵測貽害不小雖不在本縣地方盤踞竊發但震隣之恐應作未雨之防今查邠州營分防本縣城

守及土橋二處兵丁不滿三十餘人汎廣兵單深不足恃愚見謂石門關一帶宜添設防兵以資捍禦則接壤州邑皆可無虞合請俯念封疆從長酌議庶地方有攸賴矣

再請防禦議

竊照本縣石門關一帶乃耀州淳化宜君同官交錯之地奸宄出沒無常宜添設防兵情由已具詳本部院 蒙批據詳已悉矣此繳在案近聞淳化縣有土賊劫奪布客之事深切震隣之恐復聞有賊從北來經過石門關南去等情卑職隨即召集鄉勇同防兵趕逐并馳會邠州營王守備親領兵入山追捕賊已無踪仍嚴飭各鎮堡防備固守外伏思本縣土蕪人稀汎廣兵單石門關以外皆隣封汎界深山崖谷之中奸宄易於潛匿雖幸本地方未有失事而賊情不測誠恐滋

蔓難圖方今多事之時傳聞不一人心惶惑不可不早爲綢繆也卑職思維在前 題請西鳳協一營者原爲西安府屬各州縣而設也獨三水一縣向未蒙呈請其內造有本縣地方奉委于邠州營兼汎第邠營額兵單少分布縣城土橋二處僅兵三十名見今淳化北山土寇出沒劫掠而本縣接壤交界萬一奸宄窺伺虛實一旦陡發兵微民稀何堪應急當卽馳移邠州營統兵援剿然遠難驟至未免掣襟露肘合無比照西安二十三州縣增添防兵數十名於石門關一帶安設駐防則賊夥無由潛踪接壤州縣亦可安堵此誠今日急着應否可行伏祈速賜裁奪并請飭延慶隣近州縣營弁協力防禦共保無虞地方幸甚

三請防禦議

竊照真寧賊寇猖狂於本月二十四日突犯本縣城池卑職督率居民用火炮擊敗賊衆解圍南去已經塘報外茲者大兵臨縣賊已遠遁此皆仰藉憲臺德威所致業經申報在案但慶陽變亂本縣逼近賊境誠恐兵去賊來出沒無常以一駐防把總兵不滿五十馬僅二匹勢難守禦相應預請酌撥精兵數十名馬十餘匹於本縣險要處所如底廟鎮一帶乃真寧交界地方駐札防守則奸宄自當屏跡且城鎮有備亦可無煩調遣之勞此今日地方急着不得不亟請憲裁者也卑職從封疆起見不揣冒陳伏祈鑒照

四請防禦議

竊照本縣邑城空闊兵少民稀屢詳在案近因隣寇劫掠往來兵馬入城駐札百姓皆移居連城東西二堡查本縣倉庫

原設在西堡係順治初前任知縣王儒申請建置沿至今日獲保無虞細思倉庫爲重守城不得不兼守堡卑職晝則入城辦事夜則入堡守宿勞瘁所不敢辭但真寧爲不共之仇迫在密邇而防兵寥寥無幾前蒙憲牌云檄行固原鎮議撥官兵防禦竟未見至而邠營王參將又仍回邠矣竊思邠州既有固鎮重兵彈壓則邠營兵馬移駐本縣亦計之得者若必俟賊來攻圍然後請兵不但兵未至而民已受荼毒及賊去兵來而兵亦疲奔走況賊寇俱從石門關七里川來往則本縣一邑乃耀淳涇原之唇齒似不可不從長計議也抑更有請者慶陽一路通於平鞏今大兵住涇尙未進克平涼似可先分餘力以靖慶寧上絕平鞏之狡謀下固西安之門戶又不獨出本縣於湯火已也此在憲臺必有碩畫非卑職

所敢置喙但卑職身處危疆懸望日切故不揣謬陳伏祈鑒照

五請防禦議

看得慶寧變亂以來本縣屢遭荼毒且流入內地耀淳涇原皆受其害今又盤踞山中出沒搶掠猖獗日甚此蓋窺本縣防守單弱乃敢深入橫行無忌也本縣雖凋殘小邑實乃西安咽喉今大兵進勦未卜何期而邠耀二州既有重兵彈壓獨真寧一路通賊往來寧州前報恢復今仍爲賊踞而寧州至本縣僅一百四五十里賊已滋蔓似非昔比豈一把總五十名兵所足抵禦哉卽邠州營雖係分汛而兵制有限不無顧此失彼爲今之計倘再恢寧州設重兵以守之上也次則本縣扼要之地宜增設防兵以固門戶此萬不可緩者與其

賊至調兵而分勦煩擾孰若屯兵要地而覬覦潛消否則恐賊勢日熾民日生蹙軍需將無所出勢必至於民皆爲盜矣卑職從封疆起見不識忌諱屢經申詳在案今據各邑士民公請謬陳一得之愚伏祈俯鑒民情詳察地形速賜裁奪地方幸甚

又請禁兵馬入城議

看得兵馬不許進城先經奉

旨通飭在案近因征勦賊寇入城駐營山僻小邑從未經見不免驚惶慮恐日後兵馬來往習爲成例小民不得安生所以有此哀控也本縣邑小民貧而城內居民竭力守禦皆係良善似當稍加軫恤合請恩鑒明示申飭嗣後如有兵馬止住關廂遵照前

旨不許進城則小民獲有寧居地方幸甚

又請免鄉勇丁徭及改運糧草議

竊照平慶變亂以來眞寧逆寇出沒無常本縣受害已極駐防兵馬既有單薄之慮欲再請兵又不能朝發夕至而兵來賊遁徒滋煩擾爲今之計莫若訓練鄉勇平居守望相助有急則合力撲勦庶稍有濟查本縣鄉兵已經時加操練惟是百姓各有身家糧徭旣責其遠運糧草又欲使之分身以急公事勢所甚難合無申請俯准應募鄉兵除地糧應納外暫免本身丁徭俟事平之日照舊徵追在

朝廷所豁無幾而凡茲鄉勇蒙軫恤之恩自無不鼓勵思奮矣又本縣土瘠民貧去歲禾麥失收糊口無資近供應各項軍需愈疲奔命監門之繪有所難盡見今運涇糧草竭蹶陸

續輓輸然途遠力艱兼賊寇密邇旣乏裹糧之儲復懷內顧之憂不無觀望稽延仰祈恩准近運邠州彼處有車路可通且見駐固原鎮邠州營兵馬可以支銷如此則民困漸蘇供運必多憲諭所云殘黎稍有起色軍需供辦無誤卑職或可藉以無曠厥職也再查本縣底廟一鎮爲咽喉之所界連眞寧賊寇猖獗兵民俱不敢來往雖卑職數年來極力訓養百姓皆知忠義不甘從賊然賊勢滋蔓兵不一至保無有勢孤情危使供賦之地反爲賊藪者乎應請憲飭駐防兵馬時常到彼查巡庶百姓知我兵有鷹揚之威愈加奮勇而逆賊聞風亦必斂跡矣至眞寧賊寇雖多但皆烏合之衆前繳偏二副將領兵到縣請以一紙書詰問眞寧縣賊皆抱頭鼠竄倘得一支勁旅直搗巢穴蕩平亦可立致此在憲臺廟算屬邑

均有厚望焉

三水縣志卷七終